



Nersussuit puulukillu nujuitsut neqaannik ilivitsunik aamma affarnik nioqqutissat 1999-mi eqqussuinermit akitsuutaarutsinneqarnerisa sunniutaannik nalilersuinermit Naalakkersuisut UKA2022-mi saqqummiussinissaat pillugu Inatsisartuni aalajangiiffigisassatut siunnersuut. Nalilersuinermit ilaatigut akitsuutaarutsitsinermit ataatsimut piffinnilu suliffissaqartitsinikkut sunniutit kiisalu neqinik igaannariangorlugit sulianik eqqussuisarnermut sunniutit ilanngunneqassapput. Taamattaq nalilersuinermit nunatsinni neqinik tunisassianik suliarinnittarneq annertunerulersinniarlugu eqqussuinermit killiliissutaasinnaasut qulaajarnissaat ilaatinneqassaaq.

(Inatsisartunut ilaasortaq Mariane Paviasen, Inuit Ataqtigiit)

(Siullermeerneqarnera)

Kalaallit Nunaanni inuuneq najugaqarnerlu akikinnerussapput. Demokraatit isumaqarput, uagut politikikkut sapinngisarput tamaat, kalaallit qaammatit tamaasa amerlanernik aningaasaateqalernissaat sulissutigisagipput. Taamaattumik siunnersuuteqarsimavugut akitsuutit arlallit appartinneqarnissaannik imaasillugu, ulluinnarni pisiassat akikinnerulersillugit.

Ajoraluartumilli paasivara, Naalakkersuisut naalakkersuisooqatigiillu isumaqataaffiginnikkaat, siunnersuutillu taakku unitsikkallarnissaat qinersimallugu, akileraarutitut- aamma akitsuutitut aaqqussuusseqqinnissat sulii qanoq innissaanik ilisimaneqanngitsup saqqummiunnissaannut.

Demokraatit paasisinnaangilluinnarpaat, Naleraq aamma Inuit Ataqtigiit kalaallimut naliginnaasumut ulluinnaat oqinninngortinnissaat kissaatiginngimmassuk. Pingaartumik partiit taakku tamarmik sivoorsuarmik neriorsuutigisareerlugu. Nilliaannaq illuatungiliuttuunermi aammalu upernaq qineqqusaarnermi.

Uuminnga siunnersuuteqarnikkut Inuit Ataqtigiit misissorusuppaat, nersutit neqaat ilivitsut aamma affat tikisinneritut akitsuutit peernissaat, 1999-imi aaliangerneqartut, takorloorneqarsimasutut kinguneqarsimanersoq. Uanga imatut paasivara, misissuinissamik una siunnersuut Inuit Ataqtigiit akitsuutinik eqqusseqqinnissamik kissaateqarnerannut paasineqatsaaliornertut, Inuit Ataqtigiimmi isumaqarmata, akitsuusiinerup kingunerissagaa, innuttaasut nunatsinneersunik neqinik pisisalissasut.

Uanga inuttut eqqarsartaaseq taamaattoq paasisinnaangilara, nunanit allanit tikisitat ingerlaannaq kingunerisinnaangimmassuk, nunatsinni tunisassiarineqarsimasut akikinnerulernerat. Taamaattumik nersutit neqaannut ilivitsunut affarnullu tikisitsinernut akitsuusiinerup kinguneriinnassavaa, Kalaallit Nunaanni najugaqarnerup inuuniarnerullu akisunerulernerat. Nersutit ilivitsut aamma affat akitsuutaasa taamatuttaaq inuiaqatigiinni naligiinngissuseq annertusissavaa.

Tamanna tunngavigalugu pissutissaqarsorinngilluinnarpara siunnersuutip uuma tapersorsornissaa. Takusinnaavara, Naalakkersuisut toqqaannartumik naalakkersuisooqatigiinni ilaasortap siunnersuutaa itigartikkusunngikkaat, taamaattumillu neqerooruteqarlutik, siunnersuut akileraarnermut- aamma akitsuutitut aaqqussuusseqqinnissami piareersarnermi ilanngunneqassasoq. Tamanna ajoriffissaqartingilara aammalu tapersorsorinnaallugu.



Taamaattumik nalunaarutigissavara, Demokraatit Naalakkersuisut allannguutissatut siunnersuutaa tapersermassuk, pissutissaqarsorinngilarpulli, siunnersuutip ataatsimiititaliami suliareqqinneqarnissaa.